

■ PUNTG DA VISTA

Dus «giuvenotters» sco pli auts Svizzers – in nov trend?

DA CLAUDIA CADRUVI / ANR

Il 2016 vegnan las duas chombras federalas probabel presidiadas da politichers giuven. La pld è quest onn en roda e nominescha gist per omaduas chombras il segund vicepresidente. Per il cussegl naziunal propona la partida *Christa Markwalder* (BE). Per il cussegl dals chantuns *Raphaël Comte* (NE). Markwalder ha 38 onns, Comte 34 onns. L'elecziun succeda il glindesdi.

Tenor turnus muntan ils dus politichers l'onn proxim sin il post da l'emprim vicepresidente e suenter sin la sutga presidiala. Il president dal cussegl naziunal vala sco pli aut Svizzer. Markwalder vegn pia ad esser en dus onns la pli auta persuna dal pa-

jais. Forse sa mussa qua in nov trend.

Il 2009 ha *Pascale Bruderer* (AG) ademplì l'uffizi cun 32 onns. La socialdemocrata è stada l'emprima politicra giuvna dapi hahaias sin quest post. Bruderer ha racoltà simpatias da tuttas varts. Las arbagias èn sa tschentadas sco da sezzas sin sia testa: Il 2010 ha ella retschavì il Swiss Award. Ella è diventata «politicra da l'annada». Ed in onn pli tard ha Argovia elegì ella sco emprima socialdemocrata en la chombra pitschna.

La pld para uss da vulair imitar quest recept da success. Tgunsch pussaivel ch'i gartegia. Markwalder ha las premissas da gudagnar las simpatias e da far strada sin la medema moda sco

Bruderer. Sch'i reussescha vegnan era autras partidas a proponer en l'avegnir glied giuvna per l'uffizi.

Daventa il post dal pli aut Svizzer uschia in vehichel da profilaziun per partidas? In motor da promoziun per personas che n'han – auter che politica – betg vesì la massa? È quai negativ u èsi forse gnanc uschè nausch?

L'incumbensa principala da la presidenta u dal president è da manar las sesidas dal cussegl naziunal. Ses titel sco pli aut Svizzer n'è francà nagliur en la lescha. Ma el timuna era l'assemblea federala. Lezza elegia il cussegl federal e decida uschia davart il destin dals regents svizzers. En quest senn stat la presidenta u il president dal gremi electoral sur il

cussegl federal e vegn perquai numnà il pli aut Svizzer u la pli auta Svizra.

Grondas funcziuns represchentativas na sto il pli aut Svizzer betg exnum ademplir. Sch'el vul far gronds e lungs viadis en l'exterior u sch'el prenda part mo da paucas occurrenzas naziunalas stat sura al gust dal singul magistrat. I n'exista nagina obligaziun represchentativa sco quella ch'il president Joachim Gauck ademplescha en Germania.

Perquai n'èsi betg in svilup nunn pussaivel sche politichers sut 40 mainan en l'avegnir l'assemblea federala. I n'è tuttavia betg nuncunvegnent sche l'exempel da Bruderer & co fa scola. Tuttina sa mida la fatscha da quest uffizi.

Fin uss ha ina partida adina nominà il politicher pli merità u la politicra cun la pli gronda experientscha. Pudair presidiar ina chombra federala muntava ina sort distincziun, in segn da respect u schizunt ina tscherta veneraziun. Savens era l'uffizi il punct culminant d'ina carriera politica.

Cun auzar ina persuna giuvna en quest post proseguan las partidas uss auters intents. Il presidi duai esser per ils «giuvenotters» il culp da partenza per sferas anc pli autas. L'uffizi daventa uschia ina pura champagna da promoziun. Forse perda el entras gliez in pau da sia dignitad. Ed è il titel dal pli aut Svizzer lura anc adequat?